

摘藻堂四庫全書薈要

史部

欽定四庫全書薈要

史部
通典卷一百十五

詳校官員外郎臣潘紹觀



欽定四庫全書薈要卷九千二百三十二

史部

通典卷一百十四

唐 京兆杜佑君卿纂

禮七十四 開元禮纂類九 吉六

皇帝時享於太廟 凡一歲五享謂四孟月及臘宗廟三年一祫以孟冬五年一禘

以孟夏及諸享攝事並附

齋戒

將享有司卜日如常儀皇帝散齋四日於別殿致齋三

日於太極殿服通天冠絳紗袍結佩並如圓丘儀應享

官齋具序例儀

祫禘儀同

陳設

前享三日尚舍直長施大次於廟東門之外道北南向
尚舍奉御鋪御座守宮設文武侍臣次於大次之後文
官在左武官在右俱南向設諸享官次於齋坊之內

攝事

右校清掃內外守官設享
官公卿以下次於齋坊

九廟子孫於齋坊內近南西

向北上文官九品以上於齋坊之南東方南方朝集使

又於其南東方南方蕃客又於其南俱每等異位重行
西向北上介公鄙公於廟西門之外近南武官九品以
上於介公鄙公之南西方北方朝集使於武官之南西
方北方蕃客又於其南俱每等異位重行東向北上其

聖侯於文官三品之下諸州使人分方各於朝集
使之後攝事無大次及九廟子孫以下至此儀

前享

二日太樂令設宮懸之樂於廟庭如圓丘儀

所異者樹
路鼓及設

歌鐘歌磬於廟
堂上前楹間耳

右校清掃內外前享一日奉禮設御位

於廟東陞東南西向

攝事無御
位下放此

設享官公卿位於東門

之內道南執事者位於其後每等異位俱重行西面以

北為上

攝則公卿位於道北執事位於道南

設御史位於廟堂之下一位

於西南東向一位於東南西向令史各陪其後設奉禮

位於樂懸東北贊者二人在南差退俱西面設協律郎

位於廟堂之上前楹之間近西東向設太樂令位於北

懸之南北向設從享之官位九廟子孫於享官公卿之

南昭穆異位

雖有貴者以齒

文官九品以上位於子孫之南東

方南方朝集使於文官之南東方南方蕃客又於其南

俱每等異位重行西面北上介公鄮公位於西門之內
道南武官九品以上於介公鄮公之南少西當文官西
方北方朝集使於武官之南西方北方蕃客又於其南
俱每等異位重行東面北上

其褒聖侯於文官三品之下諸州使人分方各位於

朝集使之後

設門外位享官公卿以下皆於東門之外道南

每等異位重行北面西上子孫之位於享官公卿之東
少南文官九品以上於子孫之東東方南方朝集使於
文官之東東方南方蕃客又於其東俱每等異位重行

北面西上設介公鄒公位於西門之外道南武官九品

以上於介公鄒公之西少南西方北方朝集使於武官

之西西方北方蕃客又於其西俱每等異位重行北面

東上

其褒聖侯於文官三品之下諸州使人分方位設於朝集使之後攝事無九廟子孫以下至此儀

牲勝於東門之外當門西向以南為上設廩犧令位於

牲西南祝史陪其後俱北向設諸太祝位於牲東各當

牲後祝史各陪其後俱西向設太常卿省牲位於牲前

近北又設御史位於太常卿之西俱南向設鑄彝之位

於廟堂上前楹間各於室戶之左北向春夏每室雞彝
一鳥彝一犧罇二象罇二山壘二秋冬每室尊彝一黃
彝一著罇二壺罇二山壘二皆加勺罍

凡宗廟罍皆以黼

皆西

上各有牀焉

祫享設罇彝於廟堂上下每座尊彝一黃彝一犧罇二象罇二著罇二山壘二在堂

上皆於神座之左獻祖太祖高祖高宗罇彝在前楹間北向懿祖代祖太宗中宗睿宗罇彝在戶外南向其壺罇二太罇二山壘四在堂下階間北

設簋釶籩豆之位

於廟堂之上俱東側階之北每座四簋居前四簋次之
次以六甄次以六釶籩豆為後每座異之

祫禘攝事簋籩釶與正

數半皆以南為上屈陳而下設御洗於東陞東南亞獻

之洗又於東南俱北向壘水在洗東篚在洗西南肆篚

以珪瓚執罇壘篚罍者各位於罇壘篚罍之後享日未

明五刻太廟令服其服布昭穆之座於戶外自西序以東皇八代祖獻祖宣皇帝皇六代祖太祖景皇帝皇高祖高祖神堯皇帝皇祖高宗天皇大帝座皆北廂南向皇七代祖懿祖光皇帝皇五代祖代祖元皇帝皇曾祖太宗文武聖皇帝皇伯考中宗孝和皇帝皇考睿宗大聖真皇帝座於南廂北向每座皆設黼宸堯席紛純藻席畫純次席黼純左右几

省牲器

省牲之日午後十刻廟所禁斷行人太廟令整拂神幄
祝史各取毛血每座共實一豆祝史又洗肝於鬱鬯又
取胛骨共實一豆俱置饌所餘並如圓丘儀

史洗肝於鬱鬯
餘並同圓丘儀

鑾駕出宮

前出宮三日本司宣攝內外各供其職守宮設從享官
五品以上次於承天門東西朝堂如常儀前二日太樂
令設宮懸之樂於殿庭如常儀

駕出懸
而不作

享日未明七刻

槌一鼓為一嚴

三嚴時節前一
日侍中奏裁

侍中奏開宮殿門及城

門餘並與圓丘儀同唯祭官稱享為異耳

晨裸

享日未明四刻諸享官各服其服太廟令良醞令各帥

其屬入實罇壘

雞彝斚彝及犧罇象罇著罇壘之上
罇皆實以明水山壘之上罇實以元酒

鳥彝黃彝實以鬱鬯犧罇著罇實以醴齊象罇壘罇實
以盞齊山壘實以清酒祫禘之罇斚彝及五齊上罇皆

實明水山壘上罇實以元酒黃彝實以鬱鬯犧罇實以
汎齊象罇實以醴齊著罇實以盞齊壺罇實以醞齊太

罇實以沈齊山
壘實以清酒

太官令帥進饌者實諸籩豆簋簠未明

三刻奉禮帥贊引引御史博士太廟令史太祝宮闈令
及令史祝史與執罇壘篚幕者入自東門當階間重行
北面西上立定奉禮曰再拜贊者承傳凡奉禮有詞贊者皆承傳御
史以下皆再拜訖執罇壘篚幕者各就位贊引引御史
諸太祝詣東陞升堂行掃除於上令史祝史行掃除於
下訖引就位祫禘則太廟令帥其屬陳瑞物於廟庭太階之西上瑞為前中下相次及伐國所得寶器上次先後亦然俱藉以席攝事不陳瑞物寶器未明二刻贊引引太廟令太

祝宮闈令詣東陞升堂詣獻祖室入開墀室太祝宮闈

令奉出神主置於座

祫禘則未明二刻陳腰輿於東陞之東每室各二皆西向北上立定

贊引引太廟令太祝宮闈令帥內外執事者以腰輿自東陞升詣獻祖室入開墀室太祝宮闈令奉出神主各置於輿出詣座前奉神主置於座訖引太廟令以下次訖以次奉出懿祖以下如獻祖儀

奉出懿祖次奉出太祖次奉出代祖次奉出高祖次奉

出太宗次奉出高宗次奉出中宗次奉出睿宗神主置

於座如獻祖之儀

皇祖妣以下神主皆宮闈令奉出俱並而處右

訖引太廟令

以下降還本位

攝事贊引各引享官俱就門外位無駕將至下至從享官位儀

駕將至

謁者贊引引享官通事舍人分引九廟子孫從享羣官

諸方客使俱就門外位駕至大次門外迴輅南向將軍
降立於輅右侍中進當鑾駕前跪奏稱侍中臣某言請
降輅俛伏興還侍位皇帝降輅乘輿之大次繖扇華蓋
侍衛如常儀太廟令以祝版奉御署訖近臣奉出太廟
令受各奠於坵通事舍人引文武五品以上從亭之官
皆就門外位太樂令帥工人二舞入就位文舞入陳於
懸內武舞立於懸南道西其升堂座者皆脫屣於下降納如常謁者引司
空入就位立定奉禮曰再拜司空再拜訖謁者引司空

諸東陞升堂行掃除於上降行樂懸於下訖引復位初

司空行樂懸通事舍人謁者贊引各引享官及九廟子

孫從享羣官諸方客使次入就位搢事無九廟子孫以下至皇帝再拜儀但

享官再拜耳皇帝停大次半刻頃太常博士引太常卿立於

大次門外當門北向侍中版奏外辦皇帝出次華蓋侍

衛如常儀侍中負寶陪從如式博士引太常卿太常卿引皇帝凡太

常卿前導皆博士先引至廟門外殿中監進鎮珪皇帝執鎮珪華

蓋仗衛停於門外近侍者從入如常皇帝至版位西向

立每立定太常卿與博士退立於左太常卿前奏稱請再拜退復位皇

帝再拜奉禮曰衆官再拜在位者皆再拜其先拜者不拜太常

卿前奏攝事謁者進太尉之左白請行事凡攝事皆太尉初獻有司謹具請行事

退復位協律郎跪俛伏舉麾凡取物者皆跪俛伏而取以興奠物則跪奠訖俛伏

而後鼓祝奏永和之樂乃以黃鍾為宮大呂為角太簇

為徵應鍾為羽作文德之舞樂舞九成黃鍾三奏大呂太簇應鍾各再

奏偃麾戛敔樂止凡樂皆協律郎舉麾工鼓祝而後作偃麾戛敔而後止太常卿

前奏稱請再拜退復位皇帝再拜奉禮曰衆官再拜在

位者皆再拜太常卿引皇帝詣壘洗太和之樂作

皇帝每行

皆如常樂

皇帝至壘洗樂止侍中跪取匱興沃水又侍中跪

取盤興承水皇帝搯鎮珪

凡受物則搯珪奠訖執珪俛伏興

皇帝盥手

黃門侍郎跪取巾於篚興進皇帝悅手訖黃門侍郎受

巾跪奠於篚黃門侍郎又取瓚於篚興進皇帝受瓚侍

中酌壘水又侍中奉盤皇帝拭瓚訖侍中奠盤匱黃門

侍郎受巾奠於篚皆如常太常卿引皇帝樂作皇帝升

自阼階樂止侍中中書令以下及左右侍衛量人從升

以下皆如之攝事皆太尉升陞盥洗酌獻太常卿引皇帝詣獻祖罇彝所執

罇者舉罇侍中贊酌鬱鬯訖登歌作奏肅和之樂以圜

鍾之均自後登歌皆歌圜鍾太常卿引皇帝入詣獻祖神座前北

向跪以鬯裸地奠之俛伏興太常卿引皇帝出戶裕禘少退

攝事北向再拜訖太常卿引皇帝次裸懿祖次裸太祖

次裸代祖次裸高祖次裸太宗次裸高宗次裸中宗次

裸睿宗並如上儀訖登歌止太常卿引皇帝樂作皇帝

降自阼階還版位西向立樂止初羣官拜訖祝史各奉

毛血及肝膋之豆於東門外齋郎奉爐炭蕭稷黍各立於肝膋之後於登歌止祝史奉毛血肝膋與奉爐炭蕭稷黍者以次入自正門升自太階諸太祝各迎取毛血肝膋於階上俱入奠於神座前祝史退立於罇所齋郎奉爐炭皆置於室戶外之左其蕭稷黍各置於爐炭下降自阼階以出諸太祝俱取肝出戶燔於爐炭還罇所饋食

皇帝既升裸太官令出帥進饋者奉饌陳於東門之外

重行西向以南為上謁者引司徒出詣饌所司徒奉獻

祖之俎皇帝既至位樂止太官令引饌入自正門俎初

入門雍和之樂作以無射之均

自後接神之樂堂下皆奏無射

饌至太

階樂止祝史俱進徹毛血之豆降自阼階以出饌升諸

太祝迎引於陞上各設於神前

籩豆蓋簠先徹乃升籩簋既奠却其蓋於下

設訖謁者引司徒以下降自阼階復位諸太祝各取蕭

稷黍濡於脂燔於爐炭還罇所太常卿引皇帝詣壘洗

樂作皇帝至壘洗樂止皇帝盥手洗爵侍中黃門侍郎

贊洗如晨裸之儀訖太常卿引皇帝樂作皇帝升自阼
階訖樂止太常卿引皇帝詣獻祖罇彝所執罇者舉罇
侍郎贊酌醴齊訖光大之舞作太常卿引皇帝入詣獻
祖神座前北向跪奠爵少東俛伏興太常卿又引皇帝
出取爵於坫酌醴齊訖太常卿又引入詣神座前北面
跪奠爵少西興太常卿引皇帝出戶北面立樂止

祫享
樂終

八節止諸
座皆然

太祝持版進於室戶外之右東面跪讀祝文

曰維某年歲次月朔日子孝曾孫開元神武皇帝諱敢

昭告於獻祖宣皇帝

攝事云謹遣太尉封臣名下放此

祖妣宣莊皇后

張氏氣序流邁時惟孟春

孟夏孟秋孟冬

永懷罔極伏增遠感

謹以一元大武柔毛剛鬣明粢薌合薌蕝嘉蔬嘉薦醴

齊恭修時享以申追慕尚饗讀訖興

以下諸室祝文儀並同祫享祝云畧

度環周歲序云及永懷追慕伏增遠感謹以一元大武柔毛剛鬣明粢薌合薌蕝嘉蔬嘉薦汎齊肅雍明獻恭備祫享餘字並同禘享祝云皇帝再拜訖又再拜初讀

祇薦禘事太祖以下稱臣

祝文訖樂作太祝入奠版於神座出還罇所皇帝拜訖

樂止太常卿引皇帝詣懿祖罇彝所執罇者舉罍

攝事太尉

諸樽彝所取爵於坫執樽者
舉罍太尉酌醴齊他放此

侍中取爵於坫進皇帝受

爵侍中贊酌醴齊訖長發之舞作太常卿引皇帝入詣

懿祖神座前北向跪奠爵少東俛伏興太常卿又引皇

帝出取爵於坫酌醴齊訖太常卿引皇帝入詣神座前

北面跪奠爵少西興太常卿引皇帝出戶北向立樂止

太祝持版進於戶之右東向跪讀祝文曰維某年歲次

月朔日子孝曾孫開元神武皇帝諱敢昭告於懿祖光

皇帝祖妣光懿皇后賈氏讀祝文訖奠版於神座出還

樽所皇帝拜訖樂止太常卿引皇帝詣太祖樽彝所如
上儀大政之舞作祝文曰孝曾孫開元神武皇帝臣諱
敢昭告於太祖景皇帝祖妣景烈皇后梁氏餘如上儀
次代祖大成之舞作祝文曰孝曾孫開元神武皇帝諱
敢昭告於代祖元皇帝祖妣元貞皇后獨孤氏獻訖太
常卿引皇帝詣樽彝所皇帝拜訖樂止太常卿引皇帝
詣高祖樽彝所如上儀大明之舞作祝文曰孝曾孫開
元神武皇帝臣諱敢昭告於皇高祖神堯皇帝祖妣太

穆皇后竇氏訖次太常卿引皇帝詣太宗罇彝所如上儀宗德之舞作祝文曰孝曾孫開元神武皇帝臣諱敢昭告於皇曾祖太宗文武聖皇帝曾祖妣文德聖皇后長孫氏訖次太常卿引皇帝詣高宗罇彝所如上儀鈞天之舞作祝文曰孝孫開元神武皇帝臣諱敢昭告於皇祖考高宗天皇大帝皇祖妣太聖天后武氏訖次太常卿引皇帝詣中宗罇彝所如上儀酌醴齊文和之舞作祝文曰孝姪開元神武皇帝臣諱敢昭告於皇伯考

中宗孝和皇帝和思皇后趙氏訖次太常卿引皇帝詣
睿宗罇彝所如上儀景雲之舞作祝文曰孝子開元神
武皇帝臣諱敢昭告於皇考睿宗大聖真皇帝皇妣昭
成皇后竇氏訖興皇帝再拜訖又再拜初讀祝文訖樂
作太祝入奠版於神座出還罇所皇帝拜訖曲終樂止
太常卿引皇帝詣東序西向立壽和之樂作皇帝獻將
訖謁者引司徒詣東階升立於楹間北面東上皇帝獻
訖諸太祝各以爵酌上罇福酒合置一爵一太祝持爵

授侍中侍中受北向進皇帝再拜受爵跪祭酒啐酒奠

爵俛伏興諸太祝各帥齋郎持俎進太祝減神座前三

牲胙肉

各取前脚第二骨

加於俎又以籩豆取稷黍還罇所以

胙肉各置一俎上以飯共置一邊以飯授司徒司徒奉

進皇帝受以授左右太祝又以胙肉授司徒司徒受俎

以次進皇帝每受以授左右謁者引司徒降復位皇帝

跪取爵遂飲卒爵侍中進受虛爵以授太祝太祝受爵

復於坫皇帝俛伏興再拜樂止太常卿引皇帝樂作皇

帝降自阼階還版位西向立樂止文舞出鼓祝作舒和之樂出訖夏啟樂止武舞入鼓祝作舒和之樂立定夏啟樂止初皇帝將復位謁者引太尉詣壘洗盥手洗爵訖謁者引太尉升自阼階攝事則太尉將復位謁者引太常卿下放此詣獻祖罇彝所執罇者舉罍太尉酌盞齊武舞作謁者引太尉入詣獻祖神座前北向跪奠爵少東興謁者引太尉出戶北向再拜謁者又引太尉取爵於坫酌盞齊訖謁者引入詣神座前北向跪奠爵少西訖興謁者引太尉

出戶北向再拜謁者引太尉次詣懿祖罇彝所取爵於
坵執罇者舉罇太尉酌盞齊謁者引太尉入詣懿祖神
座前北向跪奠爵少東興謁者引太尉出戶北向再拜
謁者又引太尉取爵於坵酌盞齊訖謁者引入詣神座
前北向跪奠爵少西訖興謁者引太尉出戶北向再拜
訖謁者引太尉次獻太祖次獻代祖次獻高祖次獻太
宗次獻高宗次獻中宗次獻睿宗並如上儀訖謁者引
太尉詣東序西向立諸太祝各以爵酌壘福酒合置一

爵一太祝持爵進太尉之左北向立太尉再拜受爵跪
祭酒遂飲卒爵太祝進受虛爵復於坫太尉興再拜謁
者引太尉降復位初太尉獻將畢謁者引光祿卿

攝事同

詣罍洗盥洗升酌盥齊終獻如亞獻之儀訖引光祿卿
降復位武舞止登歌作雍和之樂諸太祝各入室徹豆
還罇所

徹者遷豆各一少移於故處

登歌止奉禮曰賜胙贊者唱衆

官再拜在位者皆再拜

已飲福者不拜

永和之樂作太常卿前

奏稱請再拜退復位皇帝再拜奉禮曰衆官再拜在位

者皆再拜樂一成止太常卿前奏禮畢太常卿引皇帝
還大次樂作皇帝出門樂止殿中監受鎮圭華蓋侍衛
如常儀通事舍人謁者贊引各引享官及九廟子孫從
享羣官諸方客使以次出贊引引御史太祝以下俱復
執事位立定奉禮曰再拜御史以下皆再拜贊引引出
工人二舞以次出太廟令與太祝宮闈令納神主如常
儀其祝版燔於齋坊

鑾駕還宮 如圖丘儀

祭七祀

各因時享祭之惟中雷季夏別祭祫禘之日徧祭之如臘享

司命戶以春竈以夏中雷以季夏王日門厲以

秋行以冬

祭日未明一刻太廟令帥其屬入布神席於廟庭西門之內道南東向以北為上席皆以莞設神位各於座首設酒罇於神座東南設洗於酒罇東南俱北向壘水在洗東篚在洗西南肆

篚實以巾爵

太廟令與良醢令屬入實

罇壘如常其執罇壘篚者各位於罇壘篚之後初太祝

以下入祝史與執罇壘籩者次入就位遂於堂上設饌
訖太官丞引饌入祝史迎引於座首各設於神座前於
光祿卿將升獻贊引引獻官詣壘盥洗詣酒罇所執罇
者舉罇獻官酌酒贊引引獻官進西面跪奠於司命神
座少退西向立祝史持版進神座之右北向跪讀祝文
曰維某年歲次月朔日子開元神武皇帝遣具位姓名
昭告於司命三陽煦物四序惟始式遵常禮謹以犧齊
粢盛庶品明薦於司命尚饗戶云時維歲首升陽贊滯

竈云時維夏始盛陽作統門云時維孟秋升陰紀物厲
云時屬實沈氣序清肅行云時維冬首盛陰作紀讀祝
文訖興獻官再拜祝史進奠版於神座還罇所

其七祀
祝版祝

史一人
讀之

獻官再拜訖贊引引獻官詣酒罇所酌獻並如

上儀訖贊引引還本位於堂上徹豆祝史進徹豆還罇
所臘享祝文維某年歲次月朔日子孝曾孫開元神武
皇帝某敢昭告於獻祖宣皇帝祖妣宣莊皇后張氏肅
承靈佑錫茲介福時和年登率遵彝典謹以一元大武

柔毛剛鬣明菜鄉合鄉其嘉蔬嘉薦醴齊虔恭齋栗備

茲清祀尚饗

餘室祝文准此
太祖以下稱臣

臘享祭七祀文維某年歲

次月朔日子開元神武皇帝遣具位姓名昭告於司命
戶竈中雷門厲行今時和年豐式遵常禮謹以犧齊菜
盛庶品明薦於司命戶竈中雷門厲行尚饗獻官唯獻
司命餘座齋郎助奠餘如上儀

祫禘以功臣配享

享日未明一刻太廟令布功臣神座於太廟之庭吏部

尚書贈司空鄖國公殷開山光祿卿渝國公劉政會開
府儀同三司淮安靖王神通禮部尚書贈司空河間元
王孝恭

右配享高祖廟庭太階之東少南西向以北為

上
下並放此

司空贈太尉梁國文昭公房元齡特進贈司空鄭國文
貞公魏徵洛州都督贈尚書左僕射蔣國忠公屈突通
開府儀同三司贈司徒申國文獻公高士廉

右配享太宗廟庭少南西向以北為上

司空太子太師贈太尉英國貞武公李勣中書令贈尚書右僕射高唐縣公馬周尚書左僕射兼太子少傅北平縣公張行成

右配享高宗廟庭少南西向以北為上

侍中譙國公桓彥範侍中平陽郡公敬暉中書令兼吏部尚書漢陽郡公張柬之特進博陵郡公崔元暉中書令南陽郡公袁恕已

右配享中宗廟庭少南西向以北為上

尚書左僕射太子少傅贈司空許國文貞公蘇瓌尚書
左丞相太子少保徐國公劉幽求

右配享睿宗廟庭少南西向以北為上

諸座各設版於座首

其版文各具
題官爵姓名

每座各設壺罇二於

左北向元酒在西加勺罇置爵於罇下設洗於終獻壘
洗東南北向太廟令與良醞令以齊實罇如常堂上設
饌訖太官令帥進饌者出奉饌入祝迎引於座左各設

於座前太官令以下出祝還罇所亞獻將畢贊引引獻
官詣壘洗盥手洗爵詣酒罇所執罇者舉罍獻官酌酒
諸助奠者皆酌酒訖贊引引獻官進詣首座前東面奠
爵贊引引還本位於獻官進奠諸助奠者各進奠於座
還罇所於堂上徹豆祝進首座前徹豆還罇所

通典卷一百十四

欽定四庫全書薈要卷九千二百三十三

史部

通典卷一百十五

唐 京 兆 杜 佑 君 卿 纂

禮七十五 開元禮纂類十 吉七

皇帝孟春吉亥享先農

攝事附

齋戒

前祀五日皇帝散齋三日於別殿致齋二日一日於太極殿一日於行宮餘同上辛儀

陳設

前享三日陳設如圓丘儀前享二日太樂令設宮懸樂如圓丘儀唯樂懸樹路鼓為瘞埴於壇土地外壝之內為異前享一日奉禮設御位如圓丘儀唯設望瘞位於內壝東門之內道南又設奉禮位於瘞埴西南東面南上為異

攝事右校掃除壇之內外前享二日衛尉設享官公卿以下次於外壝東門外道南北向西上

設陳饌幔於內壝東門外道南北向太樂令設宮懸前享一日奉禮郎設享官公卿位於內壝東門內道北執事位於道南西向北上設御史位於壇下如式又設奉禮位於樂懸東北贊者二人在南差退俱西向北上又

設奉禮贊者位於墀堦東面南上設協律郎位於壇上南陛之西東向太樂令於北懸間享官門外位皆於東

壝外道南如式

又設御耕籍位於外壝南門之外十步所南向

設從耕位三公諸王諸尚書諸卿位於御座東南重行西向各依推數為列其公王尚書卿等非耕者位於耕者之東重行西向俱北上介公鄼公位於御位西南東向以北為上尚舍設御耒席於三公之北少西南向奉禮又設司農卿位於御耒席東少南西向廩犧令於司農卿之南少退諸執耒耜者位於公卿耕者之後非耕

者之前西面

御耒耜一具三公耒耜三具諸王尚書卿各三人合耒耜九具以下耒耜太常各令

籍田農人執之攝事無設耕籍位以下至此儀

設酒罇之位於壇上神農氏犧

罇二象罇二山罇二東南隅北向后稷氏犧罇二象罇

二山罇二在神農酒罇之東俱北向西上

罇皆加勺罇有坫以置爵

設御洗於壇南陞東南亞獻之洗於東陞之南俱北向

執罇壘篚罇者各位於罇壘篚罇之後設幣篚於壇上

各於罇坫之所晡後郊社令帥齋郎以坫壘洗篚罇入

設於位

升壇者自東陞

謁者引光祿卿詣厨視濯漑

凡導引者每曲一邊

巡贊引引御史詣厨省饌具

光祿卿以下每事訖各還樽所

享日未明

十五刻太官令帥宰人以鸞刀割牲祝史以豆取毛血各置於饌所遂烹牲未明五刻太史令郊社令各服其服升設神農氏神座於壇上北方南向設后稷氏神座於東方西向席皆以莞設神位於座首

鑾駕出宮

乘耕根車於太極殿前餘同圓丘儀

饋享

享日未明三刻諸享官及從享之官各服其服郊社令

良醞令帥其屬入實罇壘及幣

犧罇實以醴齊象罇實以盎齊山壘實以清酒

齊皆加明水酒皆加玄酒各實於上罇幣皆以青

太官令帥進饌者實諸籩豆

簋簠等入設於饌幔內未明二刻奉禮帥贊者先入就

位其御史及禮官等入再拜掃除及就位如圓丘儀未

明一刻謁者贊引各引享官以下就門外位司空行掃

除及從享羣官客使等次入就位並如圓丘儀

攝事自未明三

刻至此與正儀同

初未明三刻諸衛列大駕仗衛陳設如式侍

中版奏外辦請中嚴乘黃令進耕根車於宮南門外迴

車南向

若行宮去壇稍遠嚴警如式

未明一刻侍中版奏外辦質明

皇帝服袞冕乘輿以出繖扇華蓋侍衛如常儀

侍中負璽陪從

如式皇帝升車訖乘黃令進耒太僕受載如初黃門侍郎

奏請鑾駕發引還侍位鑾駕動之大次並如圓丘儀郊

社令以祝版進御署訖近臣奉出郊社令受各奠於圻

如圓丘儀初皇帝降車訖乘黃令受耒耜授廩犧令而

橫執之左其耜之耜所置於席遂守之

凡執耒耜皆橫之授則先其耒

後其

皇帝停大次半刻頃其奏辦出次太常卿請行事

並如圓丘儀

攝事衆官拜訖謁者白太尉有司謹具請行事無初未明三刻下至此儀

協律

郎舉麾工鼓祝以角音奏永和之樂以姑洗之均

自後接神

皆奏姑洗

作文武舞樂舞三成偃麾戛敔樂止太常卿前奏

稱請再拜退復位皇帝再拜及奠玉幣奏樂之節並如

圓丘儀

攝事謁者引太尉升奠幣

太常卿引皇帝進北面跪奠於神

農氏神座俛伏興太常卿引皇帝少退北向再拜訖太

常卿引皇帝又立於西方東向又太祝以幣授侍中侍

中奉幣北向進皇帝受幣太常卿引皇帝進東面跪奠
於后稷氏神座俛伏興太常卿引皇帝少退東面再拜
訖登歌止太常卿引皇帝樂作皇帝降自南陛還版位
西向立樂止初羣官拜訖祝史奉毛血之豆立於門外
於登歌止祝史奉毛血入升自南陛配座升自東陛太
祝迎取於壇上進奠於神座前太祝退立於罇所皇帝
既升奠幣太官令出帥進饌者奉饌陳於內壝門外謁
者引司徒出詣饌所司徒奉神農之俎皇帝既至版位

樂止

攝事無

太官令引饌入俎初入門雍和之樂作饌至

陛樂止祝史進徹毛血之豆降自東陛以出神農氏之

饌升自南陛配座之饌升自東陛太祝迎引於壇上各

設於神座前

籩豆蓋冪先徹乃升籩簋既奠却其蓋於下

設訖謁者引司徒

以下降自東陛復位太祝各還罇所太常卿引皇帝

攝事

謁者引太尉

詣罍洗樂作其盥洗奏樂及齋郎奉俎並如圓

丘之儀太常卿引皇帝詣神農氏酒罇所執罇者舉冪

侍中贊酌醴齊訖壽和之樂作

皇帝每酌獻及飲福皆作壽和之樂

太常

卿引皇帝進神農氏神座前北向跪奠爵俛伏興太常

卿引皇帝少退北向立樂止太祝持版進於神座之右

東面跪讀祝文曰維某年歲次月朔日子開元神武皇

帝某

攝事云謹遣太尉封臣名

敢昭告於帝神農氏獻春伊始東作

方興率由典則恭事千畝謹以制幣犧齊粢盛庶品肅

備常祀陳其明薦以后稷氏配神作主尚饗訖興皇帝

再拜

攝事太尉再拜下倣此

初讀祝文訖樂作太祝進跪奠版於

神座興還罇所皇帝拜訖樂止太常卿引皇帝詣后稷

氏酒罇所

酌獻樂作並如神農氏唯皇帝東向立為異

太祝持版進於神座

之右北向跪讀祝文曰維某年歲次月朔日子開元神

武皇帝某敢昭告於后稷氏土膏脉起爰修耕籍用薦

常事於帝神農氏惟神功協稼穡寔允昭配謹以制幣

犧齊粢盛庶品式陳明薦作主侑神尚饗訖興皇帝再

拜初讀祝文訖樂作太祝進跪奠版於神座俛伏興還

罇所皇帝拜訖樂止太常卿引皇帝進神農氏神座前

北向立樂作太祝各以爵酌上罇福酒

攝事太祝酌壘福酒

其飲

福受胙樂舞等並如圓丘儀

攝事亦同
圓丘攝事

初皇帝將復位

謁者引太尉詣罍洗

攝事謁者引太
常卿為亞獻

盥手洗爵訖謁者

引太尉自東陞升壇詣神農氏象罇所執罇者舉罇太

尉酌盞齊武舞作謁者引太尉進神農氏神座前北向

跪奠爵興謁者引太尉少退北向再拜謁者引太尉詣

后稷氏象罇所取爵於坫執罇者舉罇太尉酌盞齊謁

者引太尉進后稷氏神座前東向跪奠爵興謁者引太

尉少退東向再拜謁者引太尉進神農氏神座前北向

立太祝各以爵酌鬯福酒合置一爵一太祝持爵進太尉之右西向立太尉再拜受爵跪祭酒遂飲卒爵太祝進受爵復於坵太尉興再拜謁者引太尉降復位初太尉獻將畢謁者引光祿卿詣壘洗盥手帨爵升酌盞齊終獻如亞獻之儀訖謁者引光祿卿攝事降復位武舞

止諸祝各進跪徹豆興還罇所

徹者籩豆各一少移於故處

奉禮曰

賜胙贊者唱衆官再拜在位者皆再拜

已飲福者不拜

永和之

樂作太常卿前奏稱再拜退復位皇帝再拜奉禮曰衆

官再拜在位者皆再拜樂一成止太常卿前奏請就望
座位奉禮帥贊者就座埽西南位太常卿引皇帝太和
之樂作皇帝就望座位北向立樂止於羣官將拜祝各
執篚進神座前取幣各由其陞降壇詣埽以幣置於埽
訖奉禮曰可座東西各四人寘土半埽太常卿前奏禮
畢請就耕籍位

攝事謁者進太尉之左白禮畢
享官執事再拜出如圓丘攝事

太常卿

引皇帝樂作皇帝詣耕籍位南向立樂止初白禮畢奉

禮帥贊者還本位

攝事無詣
耕籍位

耕籍

皇帝將詣望瘞位謁者引三公及應從耕侍耕者各就耕位司農先就位諸執耒者皆就位皇帝初詣耕位廩犧令進詣御耒席南北面跪俛伏搢笏解耒韜出執耒起少退北面立司農卿受耒以授侍中侍中奉耒進皇帝受以三推侍中前受耒耜反於司農司農反於廩犧令訖還本位廩犧令復耒於韜執耒起復位立皇帝初耕執耒者以耒耜各授侍耕者皇帝耕訖三公諸王五

推尚書卿九推訖執耒耜耜退復位侍中前奏
禮畢退復位太常卿引皇帝入自南門還大次樂作皇
帝出自內墻東門殿中監前受鎮珪以授尚衣奉御殿
中監又前受大珪華蓋侍衛如常儀皇帝入次樂止謁
者贊引各引享官及從享羣官諸方客使以次出贊引
引御史太祝以下俱復執事位立定奉禮曰再拜御史
以下皆再拜贊引引出工人二舞以次出太常卿率其
屬以次耕於千畝其祝版燔於齋所

鑾駕還宮

如圓丘儀

勞酒

車駕還宮之明日設會於太極殿如元會儀

唯不賀不上壽爲異

皇后季春吉巳享先蠶

攝事附

齋戒

先祀五日散齋三日於後殿致齋二日於正殿前致齋
一日尚寢設御幄於正殿西序及室中俱東向致齋之
日晝漏上水一刻尚儀版奏請中嚴尚服帥司仗布侍

衛司賓引內命婦陪位並如式六尚以下各服其服詣

後殿奉迎尚儀版奏外辦上水三刻皇后服鈿釵禮衣

結珮乘輿出自西房華蓋警蹕侍衛如常儀皇后即御

座東向坐六尚以下侍衛如常一刻頃尚儀前跪奏稱

尚儀妾姓言請降就齋室興退復位皇后降座乘輿入

室六尚以下各還寢直衛者如常司賓引陪位者退散

齋之日內侍帥內命婦之吉者使蠶於蠶室

攝事無以上儀凡

應享之官散齋三日於其寢致齋二日一日於其寢一

日於享所

亞獻終獻則致齋二日皆於其所

六尚以下應從升者及從

享內外命婦各於其寢清齋一宿諸應享之官致齋之

日給酒食及明衣各習禮於齋所光祿卿監取明水火

太官令取水於陰鑑取火於陽燧火以供爨水以實罇

前享一日諸衛令其屬未

後一刻各以其方器服守衛壝門

每門二人每隅一人享日未明給使代執

與女工人等俱清齋一宿攝事同

陳設

前享三日尚舍直長施大次於外壝東門之內道北南

向尚舍奉御鋪御座尚舍直長設內命婦及六尚以下
次於大次之後俱南向守宮設外命婦次大長公主長
公主公主以下於南壝之外道西三公夫人以下在其
南俱重行每等異位東向北上設陳饌幔於內壝東門
之外道南北向攝事守宮設享官次於東壝內道南北
向西上設陳饌幔於內壝東門外道南
北前享二日太樂令設宮懸之樂於壇南內壝之內如
圓丘儀諸女工人各為位於懸後東方西方以北為上
南方北方以西為上右校掃除壇之內外又為瘞埽於

壇之壬地內壝之外方深取足容物南出陞又為採桑壇於壇南二十步所方三丈高五尺西出陞尚舍量施帷帳於外壝之外四面開門其東門使容厭翟車前享一曰內謁者設御位於壇之東南西向設望瘞位於壇之西南當瘞垣西向設亞獻終獻位於內壝東門之內道南執事者位於其後每等異位俱重行西向北上設典正位於壇下一位於東南西向一位於西南東向女史各陪其後設司贊位於樂懸東北掌贊二人在南差

退俱西面又設司贊掌贊位於瘞堦西南東面南上設
典樂舉麾位於壇上南陛之西東向設司樂位於北懸
之間當壇北向設內命婦位於終獻之南每等異位重
行西面北上設外命婦位於中壝南門之外大長公主
以下於道東西向當內命婦位差退太夫人以下於道
西去道遠近准公主俱每等異位重行相向北上又設
御採桑位於採桑壇上東向設內命婦採桑位於壇下
當御位東北每等異位南向西上設外命婦採桑位於

壇下當御位東南每等異位北向西上設執御鉤筐者

位於內命婦之西少南西上

尚功執鉤
典製執筐

設內命婦執鉤

筐者位各於其採桑位之後

尚功下四典執鉤
典製下女史執筐

設門外

位享官於東壝之外道南從享內命婦於享官之東俱

每等異位重行北面西上從享外命婦於南壝之外道

西如設次之式

攝事內謁者設三獻位於內壝東門之內道北執事位於道南每等異位重行

西面以北為上又設望瘞位於壇之東北當瘞埽道西向又設典正位於壇下一位於東南西南向一位於西南東向女史各陪其後糾察違失設掌贊位於樂懸東北女史二人在南差退俱西向設掌贊女史位於瘞埽西

南東向南上設典樂舉麾位於壇上南陛之西東向設司樂位於北懸之間當壇北向設三獻以下門外位於東壝之外道南每等異位北設酒罇之位於壇上東南面西上無設御位下至此儀

隅北向西上犧罇二象罇二山壘二

罇皆加勺罍有坩以置爵

設御

洗於壇南陛東南

攝事無御洗

亞獻之洗又於東南俱北向

壘水在洗東篚在洗西南肆

篚實以巾爵

執罇壘篚罍者位

於罇壘篚罍之後設幣篚於壇上罇坩之所晡後內謁

者帥其屬以罇坩壘洗篚罍入設於位

升壇者自東陛

享日未

明十五刻太官令帥宰人以鸞刀割牲祝史以豆取毛

血置於饌所遂烹牲

其神厨及諸司供事便次守宮與金吾相之量於壇東張設

享

日未明五刻司設服其服升設先蠶氏神座於壇上北方南向席以莞設神位於座首

車駕出宮

前享一日金吾奏請外命婦等應集壇所者並聽夜行其應採桑者四人各具女侍者進筐鉤載之而行監門先奏請享日未明四刻開所由苑門諸親及命婦以下以次入詣壇南次所各服其服其應採桑者筐鉤各具

女侍者執授內謁者監內謁者監受之以授執鉤筐者

享日未明三刻槌一鼓為一嚴

三嚴時節前日內侍奏裁

未明二刻

槌二鼓為再嚴尚儀版奏請中嚴內命婦各服其服所

司陳車駕鹵簿未明一刻槌三鼓為三嚴司賓引內命

婦入立於庭重行西面以北為上六尚以下各服其服

俱詣室奉迎

尚服負寶如式

內僕進厭翟車於閣外尚儀版奏

外辨馭者執轡皇后服鞠衣乘輿以出華蓋侍衛警蹕

如常內命婦從出門皇后升車尚功司製進筐鉤載之

仗衛如常內命婦及六尚等乘車陪從如式其內命婦應採桑者四人各服其服典製等進筐鉤載之諸翊駕之官皆乘馬駕動警蹕如常不鳴鼓吹諸衛前後督攝如常內命婦宮人以次從

饋享

享日未明三刻諸享官各服其服尚儀及司醢各帥其

屬

攝事則女史及司醢各帥其屬

入實罇壘及幣

犧罇實以醴齊象罇實以盎齊山壘實以

清酒齊加明水酒加玄酒各實於上罇其幣以黑

太官令實諸籩豆簋簠俎等

內謁者帥其屬詣厨奉饌入設於饌幔內

內侍之屬與司膳等掌之

其牲之內不上神俎者亦太官付內謁者同時進入以供頒胙自餘供享之物並請祠前一日先入

駕將

至女相者引先置享官典內引引命婦俱就門外位

女相

者以尚儀下女史充攝事實明女相者引享官以下就墻外位掌贊帥女史先入就位女相者引典正女祝女史祝史典女執罇壘篚罍者入自東門當壇南北面西上立定掌贊曰再拜女史承傳典正以下皆再拜訖典正以下各就位司樂帥女工人就位女祝以典贊充女祝史以典贊下女史充

駕至大次門外

迴車南向尚儀進車前跪奏稱尚儀妾姓言請降車興還侍位皇后降車乘輿之大次華蓋繖扇侍衛如常儀

尚儀以祝版進御署訖奉出奠於坵初皇后降車訖尚

功司製進受鉤筐以退

內命婦鉤筐則內命婦降車訖典製等進受之

典贊引

亞獻及從享內命婦就門外位司贊帥掌贊先入就位

女相者引尚儀典正女史女祝史

女祝史以尚儀下女史充

典女執

罇壘筐罍者入自東門當壇南北面西上立定司贊曰

再拜掌贊承傳

凡司贊有詞掌贊皆承傳

尚儀以下皆再拜訖尚儀

以下各就位司樂帥女工人入就位典贊引亞獻終獻

女相者引執事者司贊引內命婦內典引引外命婦俱

入就位皇后停大次半刻頃司言引尚宮立於大次門外當門北向尚儀版奏外辦皇后出次華蓋侍衛如常

尚服負寶陪從如式

司言引尚宮尚宮引皇后

凡尚宮前導皆司言先引

入自

東門華蓋仗衛停於門外近侍者從入如常皇后至版

位西向立

每立定尚宮與司言退立於左

立定尚宮前奏稱請再拜退

復位皇后再拜司贊曰衆官再拜享官及內外命婦在

位者皆再拜

其先拜者不拜

尚宮前奏有司謹具請行事退復

位

攝事女相者各引享官入就位立定掌贊曰再拜在位者皆再拜女相者進尚宮之左白有司謹具請行

事無駕至以下至此儀

典樂跪舉麾

凡取物者皆跪而取以興奠物亦跪奠訖而後興

鼓

祝奏永和之樂以姑洗之均

自後壇下享神之樂皆奏姑洗

三成偃麾

夏啟樂止

凡樂皆典樂舉麾工鼓祝而後作偃麾夏啟而後止

尚宮前奏稱請再

拜退復位皇后再拜司贊曰衆官再拜享官及内外命

婦在位者皆再拜壇上尚儀跪取幣於篚興立於罇所

攝事掌贊曰再拜在位者皆再拜女祝史跪取幣於篚興立於罇所

尚宮引皇后正和之

樂作

皇后每行皆作正和之樂

皇后詣壇升自南陛

攝事女相者引尚宮升壇以下

皆尚宮行事

六尚以下量人從升

以下升皆如之

皇后升壇北面立

樂止尚儀奉幣東向進皇后受幣登歌作肅和之樂以
南吕之均尚宮引皇后進北向跪奠於神座興尚宮引
皇后少退北向再拜訖登歌止尚宮引皇后樂作降自
南陛還版位西向立樂止初内外命婦拜訖女祝史奉
毛血之豆立於内壝東門之外於登歌止女祝史奉毛
血入升自南陛尚儀迎引於壇上進跪奠於神座前興
女祝史退立於罇所皇后既升奠幣

攝事尚宮既升
奠幣下倣此

司

膳出帥女進饌者奉饌陳於内壝東門之外皇后既降

復位司膳引饌入俎初入門雍和之樂作

攝事自後酌獻皆奏雍和

之樂饌至陞樂止女祝史跪徹毛血之豆降自東陞以出

饌升南陞尚儀迎引於壇上

攝事女祝史迎引於上

設於神座前

邊豆蓋罍先徹乃升簋蓋既奠却其蓋於下

設訖司膳帥女進饌者降自東

陞復位尚儀

攝事女祝

還罇所尚宮引皇后詣罍洗樂作

攝事

女相者引尚宮無樂

皇后至罍洗樂止尚儀跪取匱盥沃水司言

跪取盤興承水皇后盥手又司言跪取巾於篚興進皇

后悅手訖司言受巾跪奠於篚司言跪取爵於篚興進

皇后受爵尚儀酌疊水司言奉盤皇后洗爵司言受巾

皆如初皇后拭爵訖尚儀奠匱司言奠盤巾皆如常尚

宮引皇后樂作詣壇升自南陛樂止尚宮引皇后

攝事無皇

后至疊洗以下至此儀但女相者引尚宮詣酒罇所

詣酒罇所執罇者舉罇尚儀

贊酌醴齊訖壽和之樂作

皇后每酌獻及飲福皆作壽和之樂攝事奏雍和

尚

宮引皇后少退北向立樂止尚儀持版進於神座之右

東向跪讀祝文曰維某年歲次月朔日子皇后某氏敢

昭告於

攝事女祝持版祝云皇后某氏謹遣某官妾姓敢昭告於

先蠶氏惟神肇興

蠶織功濟黔黎爰擇嘉時式遵令典謹以制幣犧齊染
盛庶品明薦於神尚饗訖興皇后再拜初讀祝文訖樂
作尚儀進跪奠版於神座興還樽所皇后拜訖樂止尚
儀以爵酌上樽福酒西向進

攝事女祝以爵酌壘福酒進於尚宮之右西向立

皇后再拜受爵跪祭酒啐奠興尚儀帥女進饌者持籩
俎進尚儀減神前三牲胙肉

以取前脚第二骨

各置一俎上又

以籩取稷黍飯共置一籩尚儀先以飯籩西向進皇后
受以授左右尚儀又以胙俎以次進皇后每受以授左

左皇后跪取爵遂飲卒爵尚儀進受復於坵皇后興再

拜訖樂止尚宮引皇后樂作降自南陛還版位西向立

樂止

自此以上若攝事儀皆尚宮行事女相女祝贊之以下倣此

皇后獻將畢典贊

引貴妃詣罍洗盥手洗爵訖

攝事則女相者引尚儀為亞獻

典贊引貴

妃自東陛升壇詣象罇所執罇者舉罍貴妃酌盞齊典

贊引進神座前北向跪奠爵興典贊引貴妃少退北向

再拜尚儀以爵酌罍福酒持爵進貴妃之右西向立貴

妃再拜受爵跪祭酒遂飲卒爵尚儀進受爵復於坵貴

妃再拜典贊引貴妃降自東陛復位如初貴妃獻將畢

又典贊引昭儀

攝事女相者引尚食為終獻

詣罍洗盥手洗爵升酌

盞齊終獻如亞獻之儀訖典贊引昭儀降復位尚儀進

神座前跪徹豆興還罇所

徹者籩豆各一少移於故處

司贊曰賜胙

掌贊唱衆官拜在位者皆再拜

已飲福酒者不拜攝事賜胙則掌贊唱賜胙女

史唱再拜也

永和之樂作尚宮前奏稱請再拜退復位皇后

再拜司贊曰衆官再拜在位者皆再拜樂一成止尚宮

前奏

攝事女相者白

請就望瘞位司贊帥掌贊就瘞埽西南位

尚宮引皇后樂作至望瘞位西向立樂止於衆官將拜
尚儀執篚進神座前取幣自北陞降壇西行詣瘞埽以
幣置於埽訖司贊曰可瘞埽東西各四人寘土半埽尚
宮前贊禮畢請就採桑位尚宮引皇后樂作詣採桑壇
升自西陞東向立樂止初白禮畢司贊帥掌贊還本位
親桑

皇后將詣望瘞位司賓引內外命婦採桑者俱就採桑

位

內外命婦一品各二人二品三品各一人

諸執鉤篚者各就位皇后既至

採桑位尚功奉金鉤自北陞升壇進典製奉筐從升皇
后受鉤採桑典製奉筐受桑皇后採桑三條止尚功前
受鉤典製以筐俱退復位皇后初採桑典製等各以鉤
授内外命婦皇后採桑訖内外命婦以次採桑女史執
筐者受之内外命婦一品各採五條二品三品各採九
條止典製等受鉤與執筐者退復位司賓各引内外命
婦採桑者退復位司賓引婕妤一人詣蠶室尚功帥執
鉤筐者以次從至蠶室尚功以桑授蠶母蠶母受桑切

之以授婕妤婕妤食蠶灑一薄訖司賓引婕妤還本位
尚儀前奏禮畢退復位尚宮引皇后還大次樂作入大
次訖樂止司賓引內命婦內典引引外命婦各還其次
尚儀典正以下俱復執事位立定司贊曰再拜尚儀以
下皆再拜訖出女工人以次出其祝版燔於齋所

車駕還宮

皇后既還大次內侍版奏請解嚴

將士不得輒離部伍

皇后停大

次一刻頃槌一鼓為一嚴轉仗衛於還塗如來儀三刻


頃槌二鼓為再嚴尚儀版奏請中嚴皇后服鈿釵禮衣
五刻頃槌三鼓為三嚴內典引引外命婦出次就門外
位司賓引內命婦出次序立於大次之前六尚以下依
式奉迎內僕進厭翟車於大次門外南向尚儀版奏外
辨馭者執轡皇后乘輿出次華蓋侍衛警蹕如常皇后
升車鼓吹振作而行內命婦以下乘車陪從如來儀車
駕過內典引引外命婦退還第駕至正殿門外迴車南
向尚儀進當車前跪奏稱尚儀妾姓言請降車興還侍

位皇后降車乘輿入侍衛如常內侍版奏請解嚴將士各還其所

勞酒

車駕還宮之明日內外命婦設會於正殿如元會儀唯不
賀不上
壽爲異

通典卷一百十五



總校官庶吉士臣侍朝

校對官庶吉士臣章宗瀛

謄錄監生臣王淦

謄錄監生臣趙炎

欽定四庫全書薈要

史部

通典卷一百十六

七

詳校官員外郎臣潘紹觀



欽定四庫全書薈要卷九千二百三十四

史部

通典卷一百十六

唐 京兆杜佑君卿纂

禮七十六 開元禮纂類十一 吉八

皇帝拜陵

將拜陵所司承制內外宣攝隨職供辦前發二日太尉
告太廟如常儀將作先脩理拜謁之所及寢宮務極潔
敬不得喧雜尚舍直長去陵十里所設行宮奉御鋪御

座齋室如常儀守宮設從駕百官及皇親諸親并客使
位及次如常儀尚舍又於拜陵所道西量設小次又於
寢宮前之西南設大次東向如常儀守宮量設侍臣次
於大次西南設羣官應陪位者次於侍臣次之西南隨
地之宜皆東向北上文官在北武官在南朝集使於武
官之南尚食先備太牢之饌珍羞庶品務極豐潔

太常
滌棧

牲牢及菜盛光祿司農
及掌祠人供辦如式

拜謁前一日皇帝至行宮詣齋

室仗衛如式陵令以玉冊進御署訖近臣奉出陵令受

訖奉禮設御位於陵東南隅西向

其有山谷隱狹則隨地設位望陵而拜

又設位於寢宮之內寢殿東階之東南西向又設百官

位於陵所行從官及皇親諸親并客使等分方位於神

道左右相對為首又設百官位於寢宮大次之前分方

序立如常並隨地之宜拜謁日未明五刻諸衛量設黃

麾仗於陵寢陳布

其陵寢舊宿衛人各依本職掌不得移動

未明三刻行從

百官及諸皇親五等已上諸親三等以上并客使等應

陪位者俱就位侍中版奏請中嚴

其布位及進嚴典儀相贊設之近仗

就陳如常未明一刻侍中版奏外辦皇帝素服乘馬以
出勅侍臣上馬曲直華蓋繖扇侍衛如常儀詣陵西南
小次所控馬以入少頃侍中版奏外辦皇帝步出次博
士引太常卿太常卿前導皇帝至位太常卿前奏請再
拜博士與太常卿退立於後皇帝再拜太常卿又前奏請再拜皇帝

又再拜奉禮曰再拜贊者承傳陪位者皆再拜又再拜

訖

凡贊拜進退皆通事舍人贊相以後准此

少頃太常卿前奏請辭皇帝再

拜又再拜奉禮曰奉辭贊者承傳陪位者再拜又再拜

太常卿引皇帝還小次乘馬出次勅侍臣上馬儀仗侍

衛詣寢宮皇帝從陵廻詣大次乘馬以入其仗衛等各

立以俟其行從百官及皇親諸親并客使等並依位序

立於大次之前所司嚴潔具酒饌侍中版奏外辦皇帝

步出大次博士引太常卿太常卿前導皇帝至寢宮南

門仗衛停於門外

其應從入之官
臨時奏聽進止

博士引太常卿太常

卿前導皇帝入內門取東廊進至寢殿東階之東南西

面立定太常卿前奏再拜訖引皇帝升東階當神座前

北面再拜訖又當皇后神座前再拜訖入進省服翫拂

拭牀帳勅所司進太牢之饌加備珍羞陳設

若有太子諸王公主

陪葬柩城內者並於寢殿東廊下所司致祭功臣陪葬者於東廊下各奠饌布位量定獻官行事

太常

卿引皇帝出詣酒罇所酌酒進

其罇站陳於當戶外之東南如常儀

皇帝

入奠酒三爵訖當神座前北向立太祝二人對持玉冊

於室戶外之右東向一太祝東向跪讀祝文訖皇帝再

拜又再拜若更進奠服翫即躬自執陳訖太常卿引皇

帝出戶當神座前北向立太常卿奏請辭皇帝再拜又

再拜訖太常卿引皇帝出中門太常卿前奏請權停

其從

官及行事官並出大門外奉候

其守宮使內侍官引內官率寢宮內人

謁見訖皇帝出侍衛如常儀還大次少頃若猶宿即乘

馬還行宮若更向前陵即於大次更進發

皆近侍先奏取進止與仗

衛計會

皇后拜陵

所司先設大次於寢宮之東隨地之宜東向鋪御座如常又設先朝妃嬪次於大次之南守宮設大長公主長

公主及諸親婦人命婦等次於妃嬪之南皆東向及拜
謁之處皆障以行帷前一日內謁者設中宮御位於寢
宮東大次前近東東向又設先朝妃嬪以下位於御位
西南各於其次之東皆重行東面以北為上司贊位於
妃嬪東北東面掌贊二人在南差退皇帝發行宮後皇
后乘四望車如常行之式之大次改服假髻白練單衣
服內典引各引妃嬪以下就位立訖內侍版奏外辦司
言引尚宮尚宮引皇后

每尚宮前導
皆司言先引

出就位

尚服負琮
寶以從如

式立定尚儀前奏再拜退復位皇后再拜司贊曰再拜

掌贊承傳諸陪位者皆再拜少頃尚儀又前奏請再拜
辭皇后再拜司贊曰再拜掌贊承傳諸陪位者皆再拜
尚宮引皇后還大次謁寢宮如常儀皇后初還大次內
典引各引陪位者退皇后拜陵訖於寢宮東大次改服
鈿釵禮衣

若服常服臨
時聽進止

乘輿詣寢宮司服負琮寶以從

侍衛如常先朝妃嬪大長公主長公主陪後如常式至
宮北門降輿入大次皇帝既入寢宮尚宮引皇后侍從

如常詣寢殿前西階之西東面立其妃嬪公主等陪從
立於皇后之南皆東面北上又設司贊位於妃嬪東北
東面掌贊二人在南差退在位者立定尚儀前奏請再
拜皇后再拜司贊曰再拜掌贊承傳妃嬪以下皆再拜
訖尚宮引皇后升自西階入室

妃嬪公主等
仍立於階下

詣先帝神

座前北面再拜訖尚宮又引皇后詣先帝皇后神座前
北面再拜訖復引皇后進省先后服翫訖引退西廂東
面立進食訖皇帝出尚宮引皇后從出降自西階復階

下位尚儀奏再拜皇后再拜訖司贊曰再拜掌贊承傳
妃嬪以下皆再拜訖請皇后之大次更衣妃嬪以下皆
更衣皇后出寢宮北門乘四望車還行宮侍從如來儀
太常卿行諸陵

所司先擇吉日行日之朝車府令具輅車駕一馬清道
青衣團扇曲蓋繖扇俱詣太常寺門布列以候守宮先
於陵南百步道東設次西向北上右校令具翦除利器
以備灑掃太常卿公服乘車奉禮以下公服陪從到次

降車停便定奉禮設卿位於北門外之左西向陵官在卿位東南執事官又於其南俱西面北上設奉禮位在陵官之西西面贊者二人在南少退謁者引太常卿出次就位贊引諸官以次就位立定奉禮曰再拜贊者承傳在位者俱再拜謁者引太常卿贊引引諸官以次入奉行畢謁者引復位奉禮曰再拜在位者皆再拜謁者引太常卿贊引引諸官各就便坐少頃乘車發行次詣諸陵奉行如上儀若應須灑掃及芟薙脩理皆即隨事

處分

薦新於太廟

薦新之日太廟令帥齋郎灑掃廟之內外太官先饌所

薦之物於神廚

若有酒者廟司設罇坩罍洗如式

謁者引太常卿入立

於門東之內道北面謁者贊引稱再拜太常卿再拜進

饌者奉饌入自正門升自太階各詣於神座前

遵豆蓋幕徹之

如式訖降自東階以出謁者引太常卿升自東階詣獻祖

室戶前盥洗酌獻訖再拜又再拜

若無酒即俱再拜

訖謁者引

太常卿復位謁者贊拜訖謁者引出

薦新物附

冬魚蕨筍蒲白韭堇小豆胥豆蓂荷菱人子薑菱索春
酒桑落酒竹根黃米粳米糯米梁米稷米茄子甘蔗芋
子鷄頭人苜蓿蔓菁胡瓜冬瓜瓠子春魚水蘇枸杞芙
茨子藕大麥麵瓜油麻麥子椿頭蓮子栗榛甘子李櫻
桃杏林檎橘椹菴羅果棗兔脾麋鹿野鷄薦新物皆品
物時新堪供進者所司先送太常令尚食相知揀擇仍

以滋味與新物相宜者配之以薦皆如上儀

有司享先代帝王

前享五日諸享官各散齋三日於正寢致齋二日於其

廟所如別儀

無廟者祭於壇其壇制准州社壇其祭官以當州長官充無以次通取也

諸享

官致齋之日給酒食及明衣各習禮於齋所前享一日

所在縣官清掃內外整拂神座

無廟者享日未明縣官帥其屬入詣壇東陞升

設神座於壇上近北南向席以莞以後陳設行事依在廟之位

設配座於神座東南西

向席以莞又為瘞瘠於廟後壬地方深取足容物贊禮

者設初獻位於東階東南亞獻終獻於初獻之南少退

俱西向北上設掌事者位於終獻東南重行西面以北

為上設贊唱者位於終獻西南西向北上設望瘞位於

廟堂東北西向又設贊唱者位於瘞堦東北南向東上

設享官以下位於南門之外道東重行西面以北為上

無廟者即設享官以下位於壇壝門之外道南重行北面西上

祭器之數每座罇六簋

十豆十簋二簋二鉶三俎三縣官帥其屬升設罇於廟

堂上前楹間室戶之外北向正座之罇在西配座之罇

在東

罇皆加勺罍有坫以置爵

設幣篚於罇所設洗於東階東南北

向東西當東雷南北以堂深罍水在洗東篚在洗西南

肆實爵三巾二在篚加勺罍執罇罍洗篚者各位於罇

罍洗篚之後享日未明烹牲於厨夙興掌饌者實祭器

牲體牛羊豕皆載右胖前脚三節節一段皆載之後脚三節節一段去上節載下二節又取正脊脰脊橫脊正脊代脊短脊各二骨以餘皆不設簋實稷黍簋實稻粱籩十實石鹽乾魚棗栗榛菱芡鹿脯白餅黑餅豆十實韭菹醯醢菁菹鹿醢芹菹兔醢笋菹魚醢脾菜菹豚胎若土無者各以其類充之諸享官以下

各服祭服

三品毳冕四品繡冕五品元冕六品以下爵弁

縣官帥其屬入實罇

罍及幣

每座之罍一實醴齊一實盎齊一實清酒其玄酒各實於上罍幣用帛長丈八尺色用白也

祝版各置於坵贊唱者先入就位祝與執罍罍者入

立於庭重行北面以西為上立定贊唱者曰再拜祝以

下俱再拜執罍者升自東階

壇則升自東階以後倣此

立於罍所執

罍罍者各就位升自東階行掃除於上降掃除於下

訖各引就位贊明贊禮者引享官以下俱就門外位少

頃贊禮者引享官以下以次就位立定贊唱者曰再拜

在位者皆再拜贊禮者進初獻之左白有司謹具請行

事退復位祝跪取幣於篚各立於樽所掌饌者帥執饌

者奉饌陳於南門之外

壇則奉饌陳於東牆門之外

贊禮者引初獻

升自東階

其壇則升自南陛以後初獻升降皆准此

進當神座前北向立祝

以幣東向進初獻受幣祝還樽所贊禮者引初獻入跪

奠於神座興出戶北向再拜贊禮者引初獻入當配座

西壁下東面立祝以幣北向進初獻受幣祝還樽所贊

禮者引初獻進東面跪奠於配座興退復位東面再拜

贊禮者引初獻降復位掌饌者引饌入升自東階

壇則升自

南祝迎引於階上各設於神座前掌饌者帥執饌者各

復本位祝還罇所贊禮者引初獻詣罍洗盥手洗爵升
自東階詣酒罇所執罇者舉罇初獻酌醴齊贊禮者引
初獻入詣神座前跪奠爵興出戶北向立祝持版進於
神座之右東面跪讀祝文曰帝嚳云維某年歲次月朔
日子開元神武皇帝諱謹遣具官姓名敢昭告於帝高
辛氏惟帝能序三辰功施萬物式遵祀典敬以制幣犧
齊粢盛庶品祇薦於帝高辛氏尚饗○帝堯云敢昭告

於帝陶唐氏惟帝則天而行先被四表式遵祀典敬以
制幣云云配座云敢昭告於唐司徒惟公敬敷五教弘
贊彝倫率由舊章配享於帝陶唐氏云云○帝舜云敢
昭告於帝有虞氏惟帝道光七政績宣五典式遵舊章
云云配座云敢昭告於臯陶氏惟神爰定五刑載敷九
德率由舊典云云○夏王禹云敢昭告於夏王禹惟王
克平九土功施萬代式遵祀典云云配座云敢昭告於
伯益氏惟公贊敷下土克蕃庶物率由舊章配享於夏

王禹云云○殷王湯云惟王革命黜暴功濟天下式遵
祀典云云配座云敢昭告於伊尹氏惟公弼諧政道功
格天地率由故實云云○周文王云惟王受命作周經
緯天地式遵祀典云云配座云敢昭告於太公惟公純
德孔明翼成周室率由舊典云云○周武王云應天順
人克定禍亂式遵祀典云云配座云敢昭告於周文公
召康公惟公道光十亂功著分陝率由舊典云云○漢
高帝云神武膺期撫安區夏式遵祀典云云配座云敢

昭告於蕭相國惟公翼成漢業厥功惟茂率由舊章云
云初獻再拜祝進跪奠版於神座興還罇所贊禮者引
初獻官詣配座酒罇所取爵於坫執罇者舉罇初獻酌
醴齊贊禮者引初獻入東面跪奠於配座前興進立於
西壁下東面立祝持版入立於配座之左北面跪讀祝
文訖興初獻再拜祝進跪奠版於配位興還罇所贊禮
者引初獻出戶北向立祝各以爵酌清酒合置一爵一
太祝持爵進於初獻之右西向立初獻再拜受爵跪祭

酒啐酒奠爵興祝各帥執饌者以俎跪減神座前三牲
胙肉各取前脚第二節共置一俎上以授初獻初獻受
以授掌饌者初獻跪取爵遂飲卒爵祝進受爵復於坵
初獻興再拜贊禮者引初獻降復位於初獻飲福贊禮
者引亞獻詣壘洗盥手洗爵升自東階詣酒罇所執罇
者舉罇亞獻酌盎齊贊禮者引亞獻入詣神座前北面
跪奠爵興出戶北向再拜贊禮者引亞獻詣配座酒罇
所取爵於坵執罇者舉罇亞獻酌盎齊贊禮者引亞獻

入詣配座前東向跪奠爵興退於西壁下東面再拜出
戶北向立祝各以爵酌清酒合置一爵一太祝持爵進
於亞獻之右西面立亞獻再拜受爵跪祭酒遂飲卒爵
祝受爵復於站亞獻興再拜贊禮者引亞獻降復位初
亞獻將畢贊禮者引終獻盥洗升獻飲福如亞獻之儀
訖贊禮者引終獻降復位祝各進神座前跪徹豆興還
罇所贊唱者曰再拜

非飲福受胙者皆再拜

再拜訖贊唱者又曰

再拜獻官以下皆再拜贊禮者進初獻之左白請就望

瘞位贊禮者引初獻就望瘞位西向立贊唱者轉立於望瘞東北位初獻官拜訖祝各進神位前跪取幣興降

自西階

壇則降自南陛

詣瘞埴北南面以幣置於埴贊唱者曰

可瘞埴東西面各二人填土半埴贊禮者進初獻之左白禮畢遂引初獻以下出贊唱者還本位祝與執罇壘者俱復執事位立定贊唱者曰再拜祝以下皆再拜以出祝版焚於齋所

祭中霤

季夏土王日祭中雷於太廟之庭前祭三日諸祭官散齋二日於正寢致齋一日於廟所如別儀前一日衛尉陳設如常祭日未明十刻太官丞具特牲之饌未明一刻太常令帥其屬入布神座於廟庭西門之內道南東向席以莞設神座於座首設酒罇於神座東南設洗於酒罇東南俱北向罍水在洗東篚在洗西南肆

篚俱實以巾爵

也奉禮設太廟令位於神座東南執事者位於其後俱

北向西上設門外位皆於東門之外道南重行北向以

西為上質明諸行事之官各服其服良醢之屬入實罇
壘太官丞監實籩豆簠簋贊引引太廟令又贊引引執
事者俱就門外位太祝與執罇壘篚罍者先入詣神座
前西向再拜訖各就位立定贊引引太廟令又贊引引
執事者入就位贊引贊拜太廟令以下皆再拜太官丞
出詣饌所贊引進太廟令之左白有司謹具請行事退
復位太官丞引饌入太祝迎引於座首設於神座前訖
太官丞以下還本位太祝還罇所贊引引太廟令詣壘

洗盥手洗爵詣酒樽所執樽者舉罍太廟令酌酒贊引
引太廟令進神座前西向跪奠爵俛伏興少退西向立
太祝持版進於神座之右北向跪讀祝文曰維某年歲
次月朔日子開元神武皇帝謹遣具位姓名敢昭告於
中雷賴茲保養疇庶以安式荷神功祇率常禮爰以特
牲薌合薌其嘉蔬嘉薦醴酒明祀於神尚饗訖興太廟
令再拜太祝進奠版於神座俛伏興還樽所太祝以爵
酌福酒進太廟令之左北面立太廟令再拜受爵跪祭

酒遂飲卒爵太祝進受爵還罇所太廟令俛伏興再拜
贊引引還本位太祝進跪徹豆俛伏興還罇所太祝與
執罇壘篚者俱復位立定贊引贊拜太廟令以下皆再
拜贊引進太廟令之左白禮畢遂引太廟令以下出其
祝版燔於齋所

孟冬祭司寒

納冰開冰附

前三日諸祭官散齋二日於家正寢致齋一日於祭所
右校掃除祭所衛尉陳設如常祭日未明十刻太官丞

具特牲之饌未明一刻郊社丞入布神座於廟北南向

設神位於座首又帥其屬設酒罇於座東南設洗於酒

罇東南俱北向壘水在洗東篚在洗西南肆

篚實以中爵

執

罇壘篚者各位於罇壘篚之後上林令設桃弧棘矢於

冰室戶內之右

祭訖遂留之

奉禮設上林令位於神座東南

執事者陪其後俱重行西向北上質明上林令以下各

服其服郊社丞良醞之屬入實罇壘太官丞監實籩豆

簋簠贊引引上林令又贊引引執事者俱就門外位立

定太祝與執罇壘篚幕者先入立於神座前北向俱再拜訖各就位贊引引上林令又贊引引執事者俱入就位立定贊拜上林令以下皆再拜太官丞出詣饌所贊引進上林之左白有司謹具請行事退復位太官丞引饌入太祝迎於座首設於神座前訖太官丞以下還罇所贊引引上林令盥手洗爵詣酒罇所執罇者舉幕上林令酌酒贊引引上林令進神座前北向跪奠爵俛伏興少退北向立太祝持版進於神座之右東向跪讀祝

文曰維某年歲次月朔日開元神武皇帝謹遣某官姓名敢昭告於元冥之神順茲時令增冰堅厚式遵常典將納凌陰謹以元牡秬黍嘉薦清酌明祀於神尚饗訖興上林令再拜太祝進跪奠版於神座俛伏興還罇所太祝以爵酌福酒進上林令之右西向立上林令再拜受爵跪祭酒遂飲卒爵太祝進受爵還罇所上林令俛伏興再拜贊引引還本位太祝進跪徹豆俛伏興還罇所太祝與執罇壘篚者俱復位立定贊引贊拜上林令

以下皆再拜贊引進上林令之左白禮畢贊引引上林令以下出其祝版焚於齋所

興慶宮祭五龍壇

將祭有司筮日如別儀前祀三日凡應祭之官散齋二日致齋一日如別儀前祭二日守宮設祭官次於東壇之外道南北向以西為上設陳饌幔於內壇東門之外道南北向太樂令設判懸之樂於壇南右校掃除壇之內外前祀一日晡後一刻諸衛令其屬各以其方器服

守衛壝門清齋一宿奉禮設獻官位於壝東南西向執

事位於獻官東南俱西向北上設奉禮位於獻官西南

贊者二人在南差退設祭官以下門外位於東壝之外

道南每等異位重行北向以西為上郊社令帥齋郎設

散樽五龍各二於壇上東南隅北向西上

樽加勺罍有
站以置爵

設洗於壇東南北向罍水在洗東篚在洗西南肆

篚實
以巾

爵執樽罍篚罍者各位於樽罍篚罍之後祀日未明十

刻太官令帥宰人以鸞刀烹牲於廚

牲以
少牢

未明三刻郊

社令帥齋郎各服其服升設五龍座於壇上近北南向
東上席以莞設神位各於座首未明一刻祭官以上各
服其服郊社令與良醞之屬入實罇罍太祝以幣置於
筐太官令帥進饌者實諸簋豆簋簠等設於饌幔內質
明謁者引獻官以下就門外位奉禮帥贊者先入就位
執罇罍筐罍者入當壇南重行北向以西為上立定奉
禮曰再拜贊者承傳執罇罍筐罍者皆再拜訖自東陞
升立罇所各就位太樂令帥工人入就位謁者進獻官

之左白有司謹具請行事退復位協律郎跪俛伏興舉
麾工鼓祝乃以姑洗之均樂舞三成偃麾戛敔樂止奉
禮曰衆官再拜在位者皆再拜訖復位太祝取幣於篚
立於罇所太官令帥進饌者奉饌陳於東門之外謁者
引獻官詣南陛升北向立太祝以幣授獻官獻官受幣
登歌作以南呂之均謁者引獻官進北向跪奠幣於青
龍座前諸座皆太祝助奠俱畢獻官再拜訖登歌止謁
者引獻官降自南陛還本位太官令引饌入升自南陛

太祝迎引於壇上設饌於神座前訖降復位謁者引獻

官詣罍洗盥手洗爵訖引升南陛詣酒罇所執罇者舉

罇獻官酌清酒謁者引進神座前北向跪奠爵於青龍

之座太祝等助奠諸座俱畢少退北向立太祝持版進

於青龍座之右東向跪讀祝文曰

祝文臨
時制撰

讀訖獻官再

拜太祝進跪奠版於神座俛伏興還罇所太祝以爵酌

福酒進獻官之右西向立獻官再拜受爵跪祭酒啐酒

奠爵興太祝帥齋郎進俎太祝跪減神前胙肉以授獻

官獻官受以授齋郎獻官跪取爵遂飲卒爵太祝進受爵復於坵獻官再拜謁者引降復位太祝跪徹豆俛伏興還罇所奉禮曰賜胙贊者唱衆官再拜在位者皆再拜獻官不拜奉禮又曰再拜在位者皆再拜謁者進獻官之左白禮畢遂引獻官以下出太祝以下復執事位立定奉禮曰再拜太祝再拜訖出其祝版燔於齋所如沉玉於川臨時別取進止

通典卷一百十六